

**BOSNA I HERCEGOVINA**  
**FEDERACIJA BOSNE I HERCEGOVINE**  
**BOSANSKO-PODRINJSKI KANTON**  
**JP RTVBPK GORAŽDE, d.o.o.**  
**G O R A Ž D E**

**E T I Č K I K O D E K S**  
**JP RTVBPK GORAŽDE, d.o.o. GORAŽDE**

*Goražde, mart 2011.godine*

Na osnovu člana 20. Zakona o Javnim preduzećima Federacije Bosne i Hercegovine (Službene novine FBiH broj:8/05 i 81/08), člana 44. i 48. Zakona o Javnom preduzeću Radio-televizija Bosansko-podrinjskog kantona Goražde (Službene novine Bosansko-podrinjskog kantona Goražde broj: 7/02) i članova 11. i 15. Zakona o izmjeni i dopunu Zakona o Javnom preduzeću Radio-televizija Bosansko-podrinjskog kantona Goražde („Službene novine Bosansko- podrinjskog kantona Goražde“ broj: 8/09) a u skladu sa članom 24. Statuta Skupština Javno preduzeće Radio-televizija Bosansko-podrinjskog kantona Goražde d.o.o. Goražde, na sjednici održanoj dana 23.3.2011. godine usvojila je:

## **ETIČKI KODEKS**

### **JAVNOG PREDUZEĆA RTV BPK GORAŽDE, d.o.o. Goražde**

#### **Član 1.**

Ovaj Etički kodeks primjenjuje se na:

1. sve zaposlene u javnom preduzeću, uključujući i pojedince i zastupnike koje javno preduzeće imenuje za obavljanje određenih djelatnosti,
2. sve članove Nadzornog odbora i Odbora za reviziju,
3. svako javno preduzeće ili pojedinca u čijem posrednom ili neposrednom vlasništvu je najmanje 10% od ukupne sume glasačkih prava javnog preduzeća.

#### **Član 2.**

### **Sukob interesa**

Povezano lice dužno je izbjegavati stvarne ili očigledne sukobe interesa sa javnim preduzećem u ličnim ili profesionalnim odnosima.

Sukob interesa javlja se kada lični, odnosno profesionalni interes povezanog lica onemogućava, eventualno može onemogućiti, ili se čini da materijalno onemogućava interes ili poslovanje javnog preduzeća ili sposobnost povezanog lica da ispunjava svoje obaveze i odgovornosti.

Zaposlenicima preduzeća uključujući i pojedince koje javno preduzeće imenuje za obavljanje određenih djelatnosti kao i svim članovima Nadzornog odbora i Odbora za reviziju zabranjeno je obavljanje poslova, bez obzira da li imaju ili nemaju materijalnu korist, iz okvira registrovane djelatnosti preduzeća, bez pismenog odobrenja Uprave.

Povezano lice dužno je omogućiti uvid upravi ili Nadzornom odboru ili drugom nadzornom organu u sve transakcije ili odnose za koje povezano lice opravdano očekuje da bi mogle dovesti do stvarnog ili očiglednog sukoba interesa sa javnim preduzećem.

Javnom preduzeću, prilikom poslovanja, nije dopušteno da povezanim licima nudi povoljnije uvjete od onih koje nudi drugim licima koja nisu povezana sa javnim preduzećem. U smislu ovog stava sljedeća lica se smatraju povezanim licima:

1. članovi uže porodice povezanih lica do trećeg stepena krvnog srodstva ili tazbine odnosno lica koja žive u istom domaćinstvu sa povezanim licima;
2. pravna lica koja raspolažu glasačkim pravima u javnom preduzeću;
3. pravna lica u kojima javno preduzeće ima udio od najmanje 10% (ili manje) od ukupne sume glasačkih prava;
4. pravna lica u kojima sa najmanje 10% (ili manje) sume glasačkih prava raspolaže povezano lice;
5. pravna lica u kojima je povezano lice ili neko od članova uže porodice, prema definiciji iz tačke 1. ovog stava, član Nadzornog odbora ili uprave.

Ako bilo koje povezano lice zna ili je moralo znati da je neko drugo povezano lice djelovalo u suprotnosti sa odredbama ovog člana, to povezano lice je o tome dužno odmah obavijestiti upravu i Nadzorni odbor ili drugi nadzorni organ te ostale nadležne organe.

### Član 3.

#### **Korporativne mogućnosti**

U ispunjavanju svojih obaveza i odgovornosti, povezana lica bi trebala unapređivati legitimne interese javnog preduzeća kada se za to ukaže prilika.

Sama povezana lica ne bi trebala za sopstvene potrebe koristiti mogućnosti koje se otkriju za ispunjavanje njihovih obaveza i odgovornosti prema javnom preduzeću, odnosno koristiti imovinu javnog preduzeća ili informacije ili svoj položaj u svojstvu povezanih lica, radi lične koristi.

Rivalitet povezanog lica sa javnim preduzećem u svakom od prethodno navedenih slučajeva kojim se nanosi finansijska šteta preduzeću ili preduzećima nije dozvoljen.

Da li se nekom od prethodno navedenih radnji uzrokuje finansijska šteta preduzeću utvrdit će uprava, Odbor za reviziju i Nadzorni odbor, na osnovu svih relevantnih činjenica i okolnosti, uključujući i slučaj u kojem se u lične svrhe koriste mogućnosti preduzeća, bez obzira da li je preduzeće prethodno odbilo realizirati tu predloženu mogućnost u sopstvenu korist.

#### Član 4.

### **Stručne sposobnosti i savjesno postupanje**

Povezana lica javnog preduzeća dužna su vršiti svoje funkcije, izvršavati svoje obaveze uz dužnu pažnju, stručno i savjesno.

#### Član 5.

### **Zaštita i pravilna upotreba imovine preduzeća**

U ispunjavanju svojih obaveza i odgovornosti zaposlenici, Skupština JP RTV BPK Goražde, Nadzorni odbor JP RTV BPK Goražde i uprava dužni su podsticati na odgovorno korištenje i kontrolu imovine i resursa javnog preduzeća. Imovinu preduzeća u koju spadaju podaci, materijali, zalihe, intelektualna svojina, objekti i postrojenja, softver i ostalu imovinu koja je ili u vlasništvu, pod zakupom ili se nalazi u posjedu javnog preduzeća, treba koristiti isključivo u opravdane poslovne svrhe javnog preduzeća.

Zaposlenicima preduzeća uključujući i pojedince koje javno preduzeće imenuje za obavljanje određenih djelatnosti kao i svim članovima Nadzornog odbora i Odbora za reviziju zabranjeno je koristiti imovinu preduzeća u privatne svrhe kao i istu izdavati, ustupati, poklanjati ili prodavati drugim licima ako to nije odobreno aktom Uprave i ostalih organa preduzeća .

## Član 6.

### **Povjerljivost**

Povezana lica će poštivati povjerljivost podataka do kojih dolaze u ispunjvanju svojih obaveza i odgovornosti, osim u slučajevima u kojima objavljivanje odobri javno preduzeće ili je takvo objavljivanje zakonski utvrđeno. U povjerljive podatke spadaju, pored ostalog, svi podaci nejavnog karaktera koji mogu biti od koristi konkurentima.

## Član 7.

### **Usklađenost sa zakonom, pravilima i propisima**

U izvršavanju svojih obaveza i odgovornosti, Nadzorni odbor i uprava dužni su aktivno učestvovati u kontroli provođenja važećih zakona, pravilnika i drugih propisa u javnom preduzeću. Pored toga, ako bilo koje povezano lice dođe do saznanja o bilo kojoj informaciji za koju smatra da predstavlja dokaz o materijalnom kršenju zakona, pravilnika ili propisa koji se odnose na javno preduzeće, to povezano lice dužno je ukazati na tu informaciju jednom ili više slijedećih lica: predsjedniku Nadzornog odbora, glavnom pravnom savjetniku javnog preduzeća, Skupštini javnog preduzeća, policiji te drugim nadležnim organima.

## Član 8.

### **Kreditni članovima uprave i Nadzornog odbora**

Javnim preduzećima nije dozvoljeno da na neposredan ili posredan način (kao i putem supsidijara) dodjeljuju ili organizuju dodjelu individualnih kredita članovima Nadzornog odbora, uprave, Odbora za reviziju i zaposlenicima, te produžuju ili vrše materijalne izmjene postojećih kredita dodjeljenih tim osobama. Uprava i Nadzorni odbor ne bi trebali tražiti ili pomagati u dobijanju individualnih kredita od javnog preduzeća u suprotnosti s predhodno navedenim.

## Član 9.

### **Standardi novinarske etike**

Ovaj Kodeks je usklađen sa postojećim evropskim standardima novinarske prakse. Kodeks ima za cilj da postavi osnove sistema samouređivanja u Javnom preduzeću Radio-televizija Bosansko-podrinjskog kantona Goražde, koji će biti smatran moralno obavezujućim za novinare, urednike, vlasnike i izdavače novina i periodičnih izdanja.

Novinari i urednici će poštivati općeprihvaćene principe etike i štiti profesionalni integritet novinarstva. Pored ovoga Kodeksa, zakoni i druga zakonom određena pravila u BiH, čine okvir za rad u Javnom preduzeću Radio-televizija Bosansko-podrinjskog kantona Goražde.

Urednici i uprava će osigurati da sve relevantno osoblje u Javnom preduzeću Radio-televizija Bosansko-podrinjskog kantona Goražde bude informisano o ovom Kodeksu. Organi rukovođenja i uprava preduzeća će, također, osigurati da se odredbe ovog Kodeksa u potpunosti poštuju.

## Član 10.

Novinari i njihovi prilozi imaju obavezu prema javnosti održati visoke etičke standarde u bilo kojem trenutku i pod bilo kakvim okolnostima.

Dužnost novinara je poštivati potrebe građana za korisnim, blagovremenim i relevantnim informacijama, kao i braniti načela slobode informisanja i pravo na pravedan komentar i kritičko novinarstvo.

Javno preduzeće Radio-televizija Bosansko-podrinjskog kantona Goražde će se pridržavati općeprihvaćenih društvenih standarda pristojnosti i poštivanja etničke, kulturne i religijske raznolikosti Bosne i Hercegovine.

Javno preduzeće Radio-televizija Bosansko-podrinjskog kantona Goražde će se pridržavati standarda ljudskih prava definisanih u međunarodnim i bosanskohercegovačkim aktima o

ljudskim pravima.

Javno preduzeće Radio-televizija Bosansko-podrinjskog kantona Goražde će razvijati svijest o ravnopravnosti polova i poštivanju osobnosti kao integralnog dijela ljudskih prava.

Javno preduzeće Radio-televizija Bosansko-podrinjskog kantona Goražde će štiti prava pojedinca, dok će u isto vrijeme podržavati pravo na informaciju koja služi javnom interesu.

#### Član 11.

##### **Urednička odgovornost**

Najvažnija odgovornost novinara i urednika je osigurati da njihov rad bude usmjeren ka poštivanju istine, kao i prava javnosti da sazna istinu.

Novinari će u svakom trenutku obavljati svoj posao u duhu pravednosti, istinitosti i pristojnosti pri sakupljanju informacija, izvještavanju i predstavljanju mišljenja.

Plagijati, falsifikovanje, namjerno prikrivanje važnih činjenica, primanje mita ili usluga koje bi uticale na rad izvještača ili urednika, najteži su moralni prekršaji ove profesije.

#### Član 12.

##### **Huškkanje**

Javno preduzeće Radio-televizija Bosansko-podrinjskog kantona Goražde će u svakom trenutku biti svjesno opasnosti koja se javlja kada mediji namjerno ili nehotice podstiču diskriminaciju i netoleranciju.

Imajući u vidu takvu opasnost, Javno preduzeće Radio-televizija Bosansko-podrinjskog kantona Goražde će dati sve od sebe kako ne bi huškala i/ili podsticala mržnju i/ili nejednakost na osnovu etničke pripadnosti, nacionalnosti, rase, religije, pola, seksualne orijentacije, bilo koje fizičke ili mentalne bolesti ili onesposobljenosti. Javno preduzeće

Radio-televizija Bosansko-podrinjskog kantona Goražde neće ni pod kakvim okolnostima podsticati krivična djela ili nasilje.

#### Član 13.

##### **Diskriminacija**

Javno preduzeće Radio-televizija Bosansko-podrinjskog kantona Goražde mora izbjeći prejudicirane i uvredljive aluzije na nečiju etničku grupu, nacionalnost, rasu, religiju, pol, seksualnu opredijeljenost, fizičku ili mentalnu bolest ili onesposobljenost.

Aluzije na nečiju etničku grupu, nacionalnost, rasu, religiju, pol, seksualnu opredijeljenost, fizičku ili mentalnu bolest ili onesposobljenost će biti napravljene samo onda kada su u direktnoj vezi sa slučajem o kojemu se izvještava.

#### Član 14.

##### **Ravnopravnost polova i poštivanje osobnosti**

Javno preduzeće Radio-televizija Bosansko-podrinjskog kantona Goražde će izbjegavati direktne ili indirektno komentare kojima ličnosti stavljaju u neravnopravan položaj ili ih diskriminišu po osnovi njihovog pola, roda, polnog identiteta, rodnoga identiteta, rodnoga izražavanja i/ili seksualne orijentacije.

#### Član 15.

##### **Tačnost i fer izvještavanje**

Javno preduzeće Radio-televizija Bosansko-podrinjskog kantona Goražde neće objavljivati netačne, krivonavodeće i iskrivljene materijale u vidu snimaka, fotografija, tekstova ili drugih materijala.

Snimci, prilozi, fotografije i dokumenti ne smiju biti falsifikovani i/ili korišteni na krivonavodeći način.

Novinarske informacije ne smiju prikrivati i/ili zadržavati bilo kakve važne informacije, čije



bi obznanjivanje moglo materijalno uticati na tumačenje objavljenog izvještaja i razumijevanje kod gledalaca i slušalaca.

Novinari imaju profesionalnu obvezu blagovremeno ispraviti bilo koju objavlјenu informaciju za koju se utvrdi da je netačna. Izvinjenje i/ili ispravka će biti objavlјeni s dužnim isticanjem.

Javno preduzeće Radio-televizija Bosansko-podrinjskog kantona Goražde će uvijek izvještavati istinito i tačno o ishodu radnje poduzete u vezi s klevetom u koju su bili uključeni. Novinari će izvještavati samo na osnovu činjenica čije je porijeklo novinaru poznato.

Kod izvještavanja i komentara kontroverze, novinari će se potruditi saslušati i predstaviti sve strane u sporu. Ukoliko jedna strana u kontroverzi odbije da se stavi na raspolaganje novinaru, Javno preduzeće Radio-televizija Bosansko-podrinjskog kantona Goražde može opravdano navesti ovo odbijanje u svom izvještaju.

#### Član 16.

#### **Komentar, pretpostavka i činjenica**

Javno preduzeće Radio-televizija Bosansko-podrinjskog kantona Goražde, iako je slobodno da izrazi svoja gledišta, mora napraviti jasnu razliku između komentara, pretpostavke i činjenice.

#### Član 17.

#### **Mogućnost odgovora**

Pravo na odgovor će biti prošireno na relevantne osobe ukoliko emisija, koja je u pitanju, procijeni da takav korak doprinosi tačnosti i nepristranosti izvještavanja.

Ukoliko je ikako moguće, na raspolaganje će biti stavljena mogućnost neposrednog odgovora u emisiji u kojoj je objavljena optužba i/ili netačno navedene informacije, u dužini ne većoj od integralno objavljene informacije.

## Član 18.

### **Krivo predstavljanje**

Novinari će koristiti samo pravedna sredstva da dođu do vijesti, dokumenata i/ili snimaka. Neetički je krivo predstavljati nečiji identitet ili namjeru i koristiti se mahinacijama da bi se došlo do informacije za objavljivanje, osim u ekstremnim okolnostima i u zakonitoj formi, kada bi objavljivanje informacije dobijene na takav način jasno služilo javnom interesu. Novinari i snimatelji neće dolaziti do informacija i/ili snimaka putem zastrašivanja ili maltretiranja.

## Član 19.

### **Privatnost**

Javno preduzeće Radio-televizija Bosansko-podrinjskog kantona Goražde će izbjegavati uplitanje u nečiji privatni život, osim ako takva uplitanja nisu potrebna u interesu javnosti. Teme koje uključuju lične tragedije će biti obzirno tretirane, a pogođenim ličnostima će se prići diskretno i sa saosjećanjem.

## Član 20.

### **Zaštita djece i maloljetnika**

U tretiranju djece i maloljetnika novinari su dužni krajnje obazrivo postupati, poštujući dobre običaje i Konvenciju o pravima djeteta, polazeći od interesa djeteta.

Novinari su dužni zaštititi identitet djeteta u postupcima u kojima je inače isključena javnost.

Novinari ne smiju intervjuisati niti snimati djecu mlađu od 15 godina, s pitanjima koja se odnose na porodicu djeteta, bez prisustva roditelja ili bez dozvole roditelja ili staratelja.

Novinari oprezno i s odgovornošću smiju identifikovati djecu mlađu od 15 godina u slučajevima kada su žrtve krivičnih djela.

Novinari ne smiju ni pod kakvim okolnostima identifikovati djecu mlađu od 15 godina koja su umiješana u kriminalne slučajeve kao svjedoci ili optuženi.

#### Član 21.

##### **Reklamiranje**

Reklame, političke reklame i dodaci moraju biti razdvojeni od uredničkog sadržaja i jasno označeni kao ono što jesu.

#### Član 22.

##### **Povjerljivost izvora informacija**

Kad god je to moguće, novinari se trebaju oslanjati na otvorene, identifikovane izvore informacija. Ovakvi izvori treba da budu pretpostavljeni anonimnim izvorima, čije poštenje i tačnost javnost ne može da ocijeni.

Novinari, međutim, imaju obavezu da štite identitet onih koji daju informacije u povjerenju, bez obzira na to da li su ili ne te ličnosti izričito zahtijevale povjerljivost.

#### Član 23.

##### **Autorska prava**

Značajna upotreba ili reprodukcija materijala zaštićenog autorskim pravima zahtijeva izričitu dozvolu nositelja autorskog prava, osim ako takva dozvola nije navedena u samome materijalu.

#### Član 24.

##### **Podsticanje prijavljivanja nezakonitog ili neetičkog ponašanja**

Nadzorni odbor i uprava dužni su uticati na javno preduzeće da aktivno unapređuje etičko ponašanje i podsticati zaposlenike na prijavljivanje dokaza o nezakonitom ili neetičkom ponašanju pojedinih zaposlenika javnog preduzeća.

## Član 25.

### **Odnos uposlenika međusobno, prema strankama i drugim licima s kojim na određeni način saraduju**

Odnos uposlenika prema radu i radnim obavezama mora biti stručan i profesionalan.

Međusobni odnos uposlenika treba biti saradnički, temeljiti se na međusobnom poštovanju, kolegijalnosti, uvažavanju, međusobnoj pomoći i saradnji te profesionalnoj i ljudskoj solidarnosti.

Uposlenici su dužni uzdržavati se od ponašanja kojim mogu povrijediti stručni ugled ili način rada drugog uposlenika.

Kod ukazivanja na određena postupanja ili ponašanja drugih uposlenika, odnosno stranaka i klijenata, treba postupati korektno i obazrivo, pazeći da se primjedbom ili kritikom ne ovrijedi ugled ili dostojanstvo osobe na čiji se rad ili postupanje ukazuje.

## Član 26.

Prema strankama uposlenici su obavezni ponašati se kulturno i susretljivo i dati im svaku informaciju kojom raspolazu, odnosno uputiti ih nadležnoj osobi ili tijelu.

## Član 27.

Ophođenje s strankama, klijentima, uposlenicima preduzeća te svim drugim osobama s kojima uposlenici svakodnevno komuniciraju treba biti kulturno, uljudno i na razini profesije koju obavljaju.

## Član 28.

### **Lični izgled novinara**

Lični izgled novinara mora biti služben i ozbiljan.

Odjeća novinara treba biti čista, uredna, umjerenih krojeva, primjerena pozivu koji obavljaju.

Odjeća kod žena ne smije biti uska i kratka niti neprimjereno otkrivati dijelove tijela, kako ne bi negativno djelovala na pažnju gledalaca i drugih osoba s kojima novinari svakodnevno komuniciraju u okviru svojih poslova.

#### Član 29.

### **Razumijevanje i postupanje u skladu s ovim kodeksom**

Od povezanih lica očekuje se da djeluju u skladu s odredbama ovog kodeksa. Odgovornost je svakog lica da prouči i da se upozna sa ovim kodeksom, da kod glavnog pravnog savjetnika javnog preduzeća traži dodatno pojašnjenje i savjest u vezi sa tumačenjem i zahtjevima ovog kodeksa, kao i u vezi sa svakom situacijom koja je naizgled u suprotnosti sa kodeksom.

#### Član 30.

Svi zaposlenici preduzeća uključujući i pojedince koje javno preduzeće imenuje za obavljanje određenih djelatnosti kao i svi članovi Nadzornog odbora i Odbora za reviziju će u roku od 15 /petnaest/ dana od donošenja ovog kodeksa potpisati pismenu izjavu kojom će potvrditi da su upoznati sa Etičkim kodeksom Javnog preduzeća Radio-televizija Bosansko-podrinjskog kantona Goražde d.o.o. Goražde .Ovu aktivnost je obavezna i primjenjvat će se za sva gore navedena lica shodno kadrovskim izmjenama.

#### Član 31.

### **Disciplinski postupak**

Uprava će u roku od 15 /petnaest dana/ od usvajanja ovog kodeksa izraditi Pravilnik o disciplinskom postupku koji mora da sadrži detaljne odredbe o:

- procedurama pokretanja i provođenja disciplinskog postuka,
- pravičnom postupku smjenjivanja odgovornih lica,
- odredbe o potpunom isključenju sa posla iz javnog preduzeća na period od najmanje dvije godine .

Uključujući i dužnost uprave da za tu svrhu vodi adekvatne kadrovske evidencije.

## Član 32.

### **Dužnost i odgovornost Uprave**

Uprava je dužna i odgovorna:

- za dosljedno provođenje etičkog kodeksa u javnom preduzeću;
- da osigura da sva odgovorna lica postupaju u skladu sa etičkim kodeksom tako što će se protiv lica koja krše navedeni kodeks provesti disciplinski postupak.

## Član 33.

### **Odstupanje i preduzimanje disciplinskih mjera**

Nikakva odstupanja od odredaba ovog kodeksa niti izmjene i dopune odredaba ovog kodeksa nisu dozvoljeni. Svako kršenje odredaba ovog kodeksa rezultirat će neodložnim pokretanjem disciplinskog postupka i izricanjem disciplinskih mjera i eventualnim smjenjivanjem.

Ovaj kodeks stupa na snagu danom usvajanja na Skupštini javnog preduzeća Javno preduzeće Radio-televizija Bosansko-podrinjskog kantona Goražde d.o.o. Goražde.

Broj: \_\_\_\_\_ 224/11  
Goražde, \_\_\_\_\_ 23.3. 2011. godine

PREDSJEDNIK SKUPŠTINE

\_\_\_\_\_  
Admir Osmanspahić